

四庫全書

子部

欽定四庫全書

御定淵鑑類函卷二百三十四

邊塞部五

增安南
三佛齊

真臘
爪哇

投和
重迎羅

暹羅
淳泥

彭亨
注輦

層檀

丹眉流

馬八

兒諸國

蘇門答刺

花面

錫蘭山

柯枝

滿刺加

九州山

麻逸凍

蘇祿

海南諸國

海南諸小國

安南一

增續文獻通考安南古交趾也在中國西南秦并天下
置桂林南海象郡秦亡南海尉趙佗擊併之漢置九郡

交趾居其一唐分嶺南為東西二道置節度立五筦安南隸焉宋封丁部嶺為交趾郡王傳子璉三世為黎桓所奪隨又為李公蘊所奪即封公蘊為王李氏傳八世至吳昫陳曰昫為吳昫壻遂有其國元憲宗三年遣使攻之曰昫竄海島八年日昫傳國長子光昫世祖中統二年從光昫請封為安南王十四年光昫卒子日烜立二十二年日烜僭稱大越國主世祖興兵伐之二十五年日烜遣使謝罪明年貢方物日烜卒子日燭遣使來

貢徵入朝不至武宗至大四年世子陳日煚遣使來朝
明洪武二年封日煚為安南國王賜駝鈕塗金銀印以
張以寧等至安南界日煚已卒其弟日煚嗣立詔封日
煚為王陳氏傳十二世至日焜而黎季犛篡立僭稱皇
帝國號大虞紀元天聖永樂四年以西平侯沐晟新城
侯張輔等率兵分道並進五年王柴胡等七人擒季犛
李保等十人擒其子澄安南人武如卿等擒偽大虞皇
帝蒼偽太子芮偽將相王侯柱國黎季貌等詔求陳氏

後復立為安南國王國人言黎賊殘陳氏無後乃郡縣

其地立交趾布政使司都指揮使司按察使司分十七

府曰交州北江諒江三江建平新安建昌奉化清化宣

化大原鎮蠻諒山新平乂安順化升華四十七州一百

五十七縣衛十一所三市舶司一改雞陵關為鎮夷關

安撫人民三百二十萬獲蠻人二百八萬七千五百糧

儲一千三百六十萬石象馬牛十三萬五千九百船八

千七百軍器二千五十三萬九千勅黃尚書福兼掌布

按二司事勅輔晟交趾應有懷才抱德之人悉心訪求
禮送京師擢用九月輔遣都督僉事柳升露布獻俘李
聲蒼及偽將相下獄赦澄芮等令有司衣食之陞柴胡
等指揮使僉事千戶進封輔英國公晟黔國公封升安
遠伯是冬贈故安南王陳氏子孫七人官 明一統志
曰洪熙元年寇孽黎利攻劫郡邑復命將討之宣德二
年黎利勢屈始奉表乞立陳氏後暲者王其國詔封為
安南王後利篡暲而自立朝臣復請加兵會利遣使來

貢謝罪請命因而與之朝貢不絕

安南二

增佛跡

仙遊

明一統志佛跡山在交州府石室縣上有巨人跡下有池景物清麗為一方勝

槩又仙遊

山在北江府武寧縣一名爛柯山

珊瑚

玳瑁

明一統志珊瑚有赤黑二種在

海直而軟見日曲而堅漢初趙佗獻赤珊瑚名火樹又玳瑁狀類龜而殼稍長其足有六後兩足無爪

狒狒笑

猩猩啼

晉郭璞云交州山中出狒狒狀如人面長臂黑身披髮行走食人見人則

笑下

馬援柱

諸葛鉦

後漢書馬援既平交趾立銅柱為漢界相傳在欽州

古森洞上有援誓云銅柱折交趾滅唐馬總又建二銅柱鏡著唐德以明其為伏波裔明一統志好飲酒擊

銅鼓豪富女子以金銀釵擊鼓叩竟留
與主人或云銅鼓乃諸葛亮征蠻鉦也

安南三

增詩元袁桷安南行曰輜軒使者安南來紫泥封詔行
風雷濕雲翻空海波立鐵網山裂狂蛟摧神京煌煌鎮
無極火鼠燭龍窮髮北彈丸之地何足論蚯蚓為城霧
為域瘴江如墨黃茅昏羣蠻渡江江水渾千年白雪不
到地十月青梅猶滿邨赤脚搖脣矜捷聞竹箭藏蛇襍
猿狖崛強曾誇井底蛙低徊自比泥中獸龍飛天子元

年春萬邦執璧修臣鄰朱干玉戚廣庭舞笑問銅柱今
何人君不聞重譯之人周代至時有越裳輸白雉又不
聞防風之骨能專車神禹震怒行天誅李侯桓桓水蒼
佩舌本懸河四方對後車並載朝未央稽首九拜乞取
金印歸炎荒

增頌明梁潛平安南頌曰念彼交趾作貢南土亦既有
年以奠其所惟厥姦臣敢背厥常狂言盈庭以幸樂康
天鑒在茲惟帝服訓奉若天命以征弗順皇皇聖謨百

萬其師赳赳虎臣如熊如羆帝臨送之於江之許鳴笳
沸天揮戈如雨皇帝曰吁來爾將臣汝弗究武往弔乃
民皇帝曰吁來爾統師參將副將左右其宜神機橫海
驃騎遊騎爰及鷹揚各率乃職浩浩江流桓桓我旅有
截其所有赫其武在江之西桂嶺之墟萬壘雲屯萬馬
電趨王師未來虎穴狼區蜃氣晝暝虺沫林枯王師至
止有風泠泠飛霜被野天開日晶堂堂之陣道行無留
偏將別趨乃斧其喉乃斫其寨颼飛火烈泥沙培塿何

有嵎嶠富良之江有徒林立一炬宵投羣舸如鴨大江
失據連柵齊拔乃蕩其邪乃夷其城兩都既平四郊遂
寧按兵止戈宣我皇德乃詔庶鰥載欣載悅有羊在牽
有酒盈尊延頸促武拜手轅門交人既來乃告乃謂曰
予天氓皇勿遐棄皇之宏化如天浩浩曾謂交民而不
覆幬飛章帝闕帝閔且吁曰莫交民曷圖厥初爰昔漢
唐制納內地宋化失宣投之醜類今五百年天運載旋
朕惟幾逢敢弗順天乃斷自衷乃擇俊乂立之百司統

以庶吏乃發洪音乃厲庶士交民困疲汝惠鮮之母俾
交民憂心孔懷於乎噫嘻聖澤洋洋自今其始交民永
康

真臘一

增明一統志曰真臘本扶南屬國亦名占臘其王姓刹
利名質多斯那者始併扶南而有之隋大業中始通中
國唐自武德至聖歷凡四來朝神龍以後國分為二其
南近海多陂澤為水真臘其北多山阜為陸真臘後復

合為一宋政和中遣使來貢宣和初封為真臘國王與
占城等慶元中國人大舉伐占城破之而立真臘人為
占城王故當時占城亦為屬國其屬國又有參半真里
登流眉蒲甘等國所領聚落六十餘地方七千餘里明
洪武初國王忽兒那遣其臣奈亦吉郎等表獻方物自
是朝貢不絕

真臘二

增浮胡八足

建同無鱗

隋書浮胡魚其形似鰕鱗如鸚鵡有八足又曰海中有

魚名建同四足無鱗其鼻同
於象吸水噴高五六尺

三日一聽朝 五臣三

稽首

隋書其王三日一聽朝坐五香七寶牀上施寶帳其帳以文木為竿象牙金鈿為壁狀如小屋懸金

光燄有同千赤土前有金香爐二人侍側王著朝霞古貝瞞珞腰腹下垂至脰頭戴金寶花冠被真珠璎珞足履革屐耳懸金璫常服白疊以象牙為屨若露髮則不加璎珞臣下服製大抵相類有五大臣一日孤落支二曰高相憑三曰婆和多陵四曰舍摩陵五曰髯多婁及諸小臣朝于王者輒以堦下三稽首王命上堦則跪以兩手自抱膊遠王環坐

毗野菴羅之樹 金顏篤耨

之香

明一統志毗野樹花似木瓜葉似杏實似楮菴羅樹花葉似素實似李又曰金顏香乃樹脂有淡

黃色者黑色者擘開雪白者為佳夾砂石為下其氣聚眾香番人以之和香塗身篤耨香樹如杉檜香藏于皮

老而脂自流溢者名白篤耨冬月因其凝而取之者名黑篤耨盛之以酥碎酥而熬之亦有香名篤耨酥

投和

增文獻通考曰投和國在南海大洲中真臘之南王姓投和羅名脯邪乞遙理數城城內皆王宮室城外人居可萬餘家王宿衛百人臨朝則衣朝霞冠金冠耳挂金環頸挂金綖飾寶裝皮履官屬有朝請將軍功曹主簿贊府等官分理文武州有參軍郡有金威將軍縣有城局其長官初至各選官僚助理政事刑罰盜賊多者死

輕者穿耳及頰并剪鬚私鑄銀錢者截腕國無賦稅俱
隨意貢奉以農商為業國人乘象及馬無鞍轡以繩穿
頰為節制音樂則吹蠡擊鼓其國市六所貿易皆用銀
錢小如榆莢有佛道有學校文字與中夏不同門皆東
開坐亦東向唐貞觀中遣使奉表以金函盛之又獻金
榼金鎮寶帶犀象海物等數十品

暹羅

增續文獻通考曰暹羅在占城極南濱海本暹與羅斛

二國地暹乃赤眉遺種元至正間始降於羅斛合為一國其國土瘠不宜耕種羅斛土田平行而多稼暹人歲仰給之俗煮海為鹽釀秫為酒氣候不正人尚侵掠男女椎髻白布纏頭被服長衫每有計議刑法輕重錢穀出入之事並決之婦人婦人志量在男子上貿易以貶子代錢所產有羅斛香味極清遠又有蘇木花錫犀象翠羽之屬元元貞初進金字表賜金縷衣明洪武初暹羅斛國王參烈昭毘牙遣使朝貢進金葉表詔賜大統

歷永樂初其國止稱暹羅其王遣使奈必表貢方物詔
賜古今列女傳且乞量衡為國中式從之朝貢不絕

彭亨

增續文獻通考曰彭亨國一曰彭坑地在東南海島中
暹羅迤西俗尚怪常刻木香為人殺人血祭禱祈福禳
災喜供佛其產片腦沉香花錫椰子明洪武十一年遣
使表貢番奴及方物永樂十二年遣使朝貢

三佛齊一

增宋史三佛齊國蓋南蠻之別種與占城為鄰居真臘
閩婆之間所管五十州汎海使風二十日至廣州其王
號詹卑其國居人多蒲姓唐天祐元年遣使來貢方物
宋太平興國五年其王夏池遣使茶龍眉來咸平六年
遣使來貢且言本國建佛寺以祝聖壽願賜名及鐘上
嘉其意詔以承天萬壽為寺額並鑄鐘以賜祥符元年
遣使來貢許赴泰山陪位于朝覲壇遣賜甚厚天禧元
年遣使奉金字表貢真珠象牙梵夾經毘喩奴詔許謁

會靈觀遊太清寺金明池及還賜其國詔書禮物以獎
之熙寧十年使來賜詔寵之曰吾以聲教覆露方域不
限遠邇苟知夫忠義而來者莫不錫之華爵耀以美名
以寵異其國爾悅慕皇化浮海貢琛吾用汝嘉并超等
秩以昭忠義之勸續文獻通考曰明洪武四年遣使
奉金字表來朝并貢方物

三佛齊二

增龍腦猫睛

紅藤紫礦

明一統志土產有龍腦香猫睛石

宋史土產紅藤紫礦

香油塗身

椰葉覆屋

宋史其人用香油塗身又曰累甃為城周數十里用椰

屋葉覆

瓜哇一

增續文獻通考曰瓜哇即古閩婆國濱海又名莆家龍為東南諸番之衝要元時稱瓜哇東抵古女人國西抵三佛齊南抵古大食國北抵占城屬國有蘇吉丹打板打網底物等國其在海外視占城益遠自泉南登舟海行者先至占城而後至其國其人醜恠情性語言與中

國不能相通劉宋元嘉中始通中國後絕宋淳化中其
王木羅茶遣使來朝貢大觀中復貢元世祖出師海外
諸蕃惟瓜哇之役最大然竟不能克其水有八節澗乃
瓜哇咽喉必爭地元史弼高興嘗會兵于此其國分東
西二王明永樂五年西王都馬板與東王戰滅東王十
六年西王楊惟西沙遣人獻白鸚鵡其國四鄉初至杜
板僅千家二酋主之流寓多廣東漳泉人又東行半日
至廝邨中國人客此成聚落遂名新邨約千餘家邨主

廣東人番舶至此互市金寶充溢人民富饒又南水行
可半日至淡水港乘小艇行二十餘里至蘇魯馬盆亦
千餘家半中國人港傍大洲林木蔚茂有長尾猿數萬
又水行八十里至漳沽登岨西南陸行半日至王所居
溝者伯夷僅二三百家總領七八人王宮磚墉墉高三
丈方三十餘里王蓬頭頂金葉冠胸縈嵌絲悅腰束錦
綺佩短刀跣足跨象或乘牛民男蓬頭女椎髻上衣下
悅男必腰刀刀極精巧刑無鞭朴罪不問輕重藤繫刃

殺之市用中國古錢衡量倍於中國國人大抵三種西
番賈居久者服食皆雅潔中國流寓者尚回回教持齋
受戒曰唐人土人有名無姓尚氣好鬪顏色黝黑猥頭
赤脚信鬼坐卧無椅榻飲食無匙箸啖蛇蟻蟲蚓與犬
同寢食不為穢也婚姻男造女家後五日迎婦金鼓刀
盾前後甚都婦裸披髮跣足縈嵌絲腕戴被金珠綵飾
寶粧喪有水葬火葬大葬惟死者所欲產金珠銀犀角
象牙玳瑁青鹽檳榔椒香蘇木枕榔木吉貝倒挂鳥彩

鳩綠鳩紅綠白鸚鵡白鹿白猿猴

瓜哇二

增乘軟兜

吹橫笛

宋史五月遊船十月遊山有馬可乘跨或乘軟兜樂有橫笛鼓板亦

能舞

五峰雲

八節澗

明一統志保老岸山在蘇吉丹國凡番舶未到先見此山頂聳

五峯時雲覆其上王府下通蒲奔大海

元史八節澗上接杜馬班乃瓜哇咽喉必爭之地

鸚鵡

山蝦蟆樹

明一統志鸚鵡山出鸚鵡故名宋史其酒出于椰子及蝦蟆丹樹

瓜哇三

增表劉宋閻婆婆達國王師黎婆婆達陀阿羅跋摩表曰

宋國大王大吉天子足下敬禮一切種智安隱天人師
降伏四魔成等正覺轉尊法輪度脫衆生教化已周入
于涅槃舍利流布起無量塔衆寶莊嚴如須彌山經法
流布如日照明無量淨僧猶如列宿國界廣大民人衆
多宮殿城郭如忉利天宮名大宋揚州大國大吉天子
安處其中紹繼先聖王有四海閭浮提內莫不求報悉
以茲水普飲一切我雖在遠亦沾靈潤是以雖隔巨海
常遙臣屬願照至誠垂哀納受若蒙聽許當年遣信若

有所須惟命是獻伏願信受不生異想今遣使主佛大
陀婆副使葛抵奉宣微誠稽首敬禮大吉天子足下陀
婆所啟願見信受諸有所請惟願賜聽今奉微物以表
微心

重迦羅

增續文獻通考曰重迦羅國其地與瓜哇相接高山奇
秀內有一石洞前後三門可容一二萬人田穀氣候與
瓜哇略同風俗頗淳國無君長推年高有德者主之煮

海為鹽醱林為酒地產羚羊鸚鵡木棉椰子綿紗貨用
銀花絹又去數程曰孫陀羅琵琶拖曰丹重曰圓嶠曰
彭里不事畊種專尚寇掠與吉陀崎諸國相通商船少
至

淳泥

增續文獻通考曰淳泥本閩婆屬國在西南大海中去
占城三十日程所統十四州前代不通中國宋太平興
國元豐間國王向打始遣使朝貢元無聞焉俗尚奢侈

亦煮海為鹽釀秫為酒愛敬中國人見中國人醉者則
扶之以歸所產有片腦檀香象牙吉貝布玳瑁鶴頂有
貝多加蒙二樹心可為酒亦產紙類木皮而薄瑩滑色
微綠明洪武四年遣使奉金銀箋來朝貢永樂三年詔
封淳泥國王賜印符誥命六年王率妃及子弟妹陪臣
凡百五十餘人來朝貢珍物賜宴奉天門王卒于會同
館賜謚恭順葬安德門外石子岡為樹碑立祠有司春
秋致祭子遐旺襲封 明一統志曰初國王麻那惹加

那上言蒙恩封王爵境上皆屬職方國有後山乞封表
為一方之鎮王卒其子遐旺復以為請遂封為長寧鎮
國山御製碑文刻石其上自是朝貢不絕

注輦一

增文獻通考曰注輦國東距海五千里西至西天竺千
五百里南至羅蘭二千五百里北至頓田三千里自古
不通中國水行至廣州約四十一萬一千四百里其國
有城七重高七尺南北十二里東西七里每城相去百

步凡四城用磚二城用土最中城以木為之皆植花果
襍木其第一至第三城皆民居環以小河第四城四侍
即居之第五城王之四子居之第六城為佛寺百僧居
之第七城即王之所居屋四百區所統有三十一部落
其西十二其南八其北十一今國王相傳三世矣民有
罪輕者格答重者則斬或以象踐殺之其宴則國王與
四侍郎膜拜於階遂共坐作樂歌舞不飲酒而食肉俗
衣布亦有餅餌其兵陣用象居前弓矢在後四侍郎分

領其衆國東南約二千五百里有悉蘭池國或相侵伐
地產真珠珊瑚玻璃檳榔豆蔻吉貝布獸有山羊黃牛
禽有山雞鸚鵡果有餘甘藤羅千年棗椰子甘羅崑崙
梅婆羅蜜之類花有白末利散絲蛇臍佛桑麗秋青黃
碧婆羅瑤蓮蟬紫水蕉之類五穀綠黑豆麥稻地宜竹
自昔未嘗朝貢宋大中祥符八年九月其國王羅茶羅
乍遣使侍郎三文等奉表來貢以盤捧真珠碧玻璃升
殿布於御座前降殿再拜譯者導其言曰願以表達人

慕化之意謹遣專使等五十二人奉土物朝貢凡真珠衫帽各一真珠二萬一千一百兩象牙六十株乳香六十斤三文等又獻珠六千六百兩香藥三千三百斤初羅茶羅乍既聞商舶言且曰十年來海無風濤古老傳云如此則中國有聖人故遣三文等入貢三文離本國舟行七十七晝夜歷那勿丹山婆里西蘭山至占賓國又行六十一晝夜歷依麻羅里山至古羅國國有古羅山因名焉又行七十一晝夜歷加八山古不牢山舟寶

龍山至三佛齊國又行十八晝夜度蠻山水口歷天竺
山至賓頭狼山望東西王母塚距舟所將百里又行二
十晝夜度羊山九星山至廣州之琵琶洲離本國凡千
一百五十日至廣州焉詔閤門祇候史祐之館伴凡宴
賜恩例同龜茲使明年使迴降詔羅茶羅乍賜物甚厚
天禧四年又遣使奉方物入貢明年二月其王遣使以
泥金表進真珠衫帽及真珠一百五兩象牙百株其使
自言數朝貢而海風破船不達願將上等珠就龍床脚

撒殿頂戴瞻禮以申向慕之誠乃奉銀盤升殿跪散珠
於御榻下而退熙寧十年復遣二十七人來獻豌豆珠
麻珠琉璃大洗盤生白梅花腦錦花犀牙乳香瓶香薷
薇水金蓮花木香阿魏鵬砂丁香使副以真珠龍腦登
殿跪而散之謂之撒殿既降詔遣御樂宣勞之以使為
懷化將軍保順郎將

注輦二

增表宋注輦國王羅茶羅乍表曰鉅宋之有天下也二

帝開基聖人繼統登封太岳禮祀汾陰至德升聞上穹
眷命臣昌期斯遇吉語幸聞輒傾就日之誠仰露朝天
之款臣伏聞人君之御統也無遠不臻臣子之推誠也
有道則服伏惟皇帝陛下功超邃古道建大中衣裳垂
而德合乾坤劒戟鑄而範圍區宇神武不殺人文化成
廓明明之德以臨御下民懷翼翼之心以昭事上帝至
仁不傷于行葦大信爰及于淵魚故得天鑒孔彰帝文
有赫顯今古未聞之事保家邦大定之基竊念臣微類

醯雞賤如芻狗世居夷落地遠華風虛荷燭幽曾無執
贄今者竊聽歌頌普及遐邇恨年屬於桑榆阻躬陳于
玉帛矧滄溟之曠絕在跋涉以稍艱是敢傾倒赤心遥
瞻丹闕任土作貢同螻蟻之慕臙委質事君比葵藿之
向日

層檀

增文獻通考曰層檀國在南海傍距海二千里宋熙寧
七年始入貢海道便風行百六十日經勿巡古林三佛

齊國乃至廣州其王名啞美羅啞眉蘭傳國五百年十
世矣人語音如大食地春暖貴人以越布纏頭服花錦
白疊布出入乘象馬元豐六年使保順郎將層伽尼再
至神宗念其絕遠詔賜賚有加

丹眉流

增宋史曰丹眉流國東至占臘五十程南至羅越水路
十五程西至西天竺三十五程北至程良六十程東北
至羅斛二十五程東南至閣婆四十五程西南至程若

十五程西北至洛華二十五程東北至廣州一百三十
五程其俗以板為屋跣足衣布以白紵纏首其王所居
廣袤五里無城郭出則乘象車亦有小駟四時炎熱無
霜雪未嘗至中國宋咸平四年國主多須機遣使打吉
馬等九人來貢木香鋤鑷胡黃連紫鉤紅氍花布蘇木
象牙召見崇德殿賜以冠帶服物及還又賜多須機詔
書以敦獎之

馬八兒諸國

增元史曰海外諸蕃惟馬八兒與俱藍足以綱領諸國而俱藍又為馬八兒後障自泉州至其國約十萬里其國至阿不合大王城水路得便風約十五日可到比餘國最大元世祖至元間唆都等奉璽書十通招諭諸番占城馬八兒俱奉表稱藩餘俱藍諸國未下十六年遣廣東招討司楊廷璧招俱藍國王必納的書降表附廷璧以進言來歲遣使入貢尋即遣使與廷璧再往招諭以阻風假道馬八兒國其國宰相馬因的與不阿里屏

人謂廷璧云我一心願為朝廷奴使札馬里丁入朝我

大必閣赤赴箕彈

華言國主也

告變箕彈籍我金銀田產妻

孥又欲殺我我詭辭得免今箕彈兄弟五人皆聚加一

之地議與俱藍交兵此間諸國皆有降心若馬八兒既

下我使人持書招之可使盡降廷璧以聞即遣廷璧獨

往十九年抵俱藍國王及其相馬哈麻等迎拜璽書隨

遣使入貢俱藍既下餘諸國曰馬八兒曰湏門那曰僧

急里曰南無力曰馬蘭丹曰那旺曰丁呵兒曰来来曰

急蘭亦解曰蘇木都刺皆遣使貢方物

蘇門答刺

增續文獻通考曰蘇門答刺即古蘇文達那也與花面國相接為西洋要會東南大山西北距海自滿刺加順風九晝夜可至其俗頗淳其產鶴頂錫斗蘇木胡椒潤布大笏明洪武中國王遣使奉金葉表入貢永樂中又遣使來貢已而王與花面王戰敗中矢死子弱不能復讎其妻發憤令于國曰能復此讎者我以為夫共國事

有漁翁聞之率衆敗殺花面王其妻遂從漁翁十年其國故王之子率部衆殺漁翁王自立漁翁王子蘇幹刺奔峭山思復父讎故王子遣使來訴命太監鄭和率兵往捕蘇幹刺歸獻闕下國乃寧王子感恩貢方物自後朝貢不絕

花面

增續文獻通考曰花面國地與蘇門答刺接花面者男子皆以墨刺面為花獸狀故名俗淳厚自畊而食無盜

田足稻禾他產亦盛美明初有使臣以海船駐蘇門答刺遣人往其山採硫黃其長感德遂入貢

錫蘭山

增續文獻通考曰錫蘭山國地在大海中多山而翠藍獨高挿天其海邊一盤石上有巨人跡長三丈許相傳為先世釋迦從翠藍嶼來登此山足躡其迹云下有寺稱為釋迦佛涅槃真身在寺亦有舍利子在其寢處俗氣候常暑地豐米穀產寶石水晶明永樂十年遣中官

鄭和奉勅齎金銀供器及綵粧織金寶幡施于寺及建
石碑賞賜國王等始其國人負固謀害舟師和以兵擊
破之俘其王獻闕下尋宥之歸國自是畏服金陵靜海
寺藏有佛寶來自西方每歲時出獻佛堂上祝云亦鄭
和所取

柯枝

增續文獻通考曰柯枝國與錫蘭山相對邨落傍海氣
候常熱田瘠少收地產胡椒通商販明永樂二年國王

可亦里遣其臣完者答兒等來朝貢十年詔封其國之
山為鎮國山御製碑文立其上

滿刺加

增續文獻通考曰滿刺加國傍海自三佛齊至此十日
程山孤人少受制于暹羅每歲輸金四十兩以為稅明
永樂七年太監鄭和奉詔賜以雙臺銀印冠帶袍服建
碑封域為滿刺加國暹羅始不敢擾

九州山

增續文獻通考曰九州山國與滿剌加鄰其山產沉香黃熟香明永樂七年鄭和奉表往諭諸番遣官兵入山採香時得徑八九尺長六七丈者六株香味清遠黑花細紋其山人駭然皆歎天朝之兵威力若神云

麻逸凍

增續文獻通考曰麻逸凍國其地在交欄山之西南洋海中山峻地平氣候稍熱田禾倍收國尚節義婦人喪夫則削髮髻面絕食七日多有並逝者得甦亦不再嫁

煮海為鹽釀蔗為酒產木棉黃蠟玳瑁榔花布貨用銅
鼎鐵塊五色布絹之屬

蘇祿

增續文獻通考曰蘇祿國地在東洋海中其俗少粒食
食魚蝦螺蛤短髮纏皂縵煮海為鹽釀蔗為酒氣候常
暑其產竹布玳瑁珍珠明永樂十五年國東王巴都葛
叭答刺西王巴都葛叭蘇哩峒王叭都葛巴刺卜各率
其妻子來朝貢獻玳瑁珍珠玳瑁諸物三王中惟東王為尊

歸至德州卒命有司營葬並為樹碑封其長子都麻合
為蘇祿東王十九年遣使來貢

海南諸國

呂宋

古麻刺

勿魯母恩

甘巴里

婆羅

阿丹

百花

白葛達

古里班卒

碟里

打回回

淡巴

亦思把罕甘

阿魯

阿哇

麻杖

忽魯謨斯

增續文獻通考曰呂宋海中小國產黃金人多富厚質
朴不喜爭訟明永樂三年國王遣臣隔察老來朝貢
古麻刺地在東南海中前代無考明永樂中國王哇來

頃本率其臣入朝至福州卒賜謚康靖 忽魯母恩國
地在東南海中或曰在西徼外國小土瘠產檀香速香
胡椒明永樂三年其王遣臣已即丁等入朝貢 甘巴
里國地在南海中大島上明永樂中國王兜哇刺查遣
臣得名公葛葛等來朝 婆羅國地負山面海人禮佛
素食惡殺喜施產珍珠玳瑁瑪瑙車渠明永樂四年東
西王各遣其臣勿黎哥等來朝貢珍珠玳瑁瑪瑙車渠
賜其王王妃及使人各有差 阿丹國地瀕海近古里

國壘石為城砌羅股石為屋田肥收粟麥其他產亦多

有馬步勝兵七千隣國畏之明永樂九年詔中使鄭和

賜命互市 百花國在海中依山為國俗饒富尚釋教

產紅猴龜筒玳瑁孔雀倒掛胡椒明洪武中國王刺丁

刺者望沙亦遣臣八智亞壇等奉金葉表來朝貢 白

葛達國海中一小國土瘠俗尚佛明宣德中國王遣其

臣和者里一思等入貢 古里班卒國地在海中土瘠

穀少物產甚薄明永樂三年國王遣人馬的等來朝貢

又有木骨都束國瀕海堆石為城壘石為屋物產最多
連境有卜刺哇國竹步國俱入貢又有刺撒國自古里
國舟行順風二十晝夜可至俗淳厚喪葬有禮其長亦
入貢 磔里國地在西南海中大洲上產蘇木烏木人
淳少訟尚佛明永樂三年國王遣使馬黑木等來朝貢
打回回海外小國產蘇木胡椒明永樂二年遣使麻
勿等來朝貢 淡巴國地在西南海中君臣頗有威儀
畜產城屋亦備市有交易野無寇盜稱樂土云明洪武

十年遣人來朝貢 亦思把罕甘國地在西南海中

大物產豐俗朴厚尚佛畏刑喜施惡奪亦有中國人寓

焉明永樂中遣使來朝貢 阿魯國一名啞魯在西南

海中與九洲山相望明永樂中國王速魯唐忽先遣臣

滿刺哈三附古里諸國朝貢朝廷遣中官至其國賜以

紵絲紗羅 阿哇國明永樂中國王昌吉刺遣其臣入

貢 麻林國未詳所在明永樂十三年遣人獻麒麟等

物詔厚賜之 忽魯謨斯國地在西南海中亦有石城

石屋自古里國東南行二十五日可到民富饒產大馬
西洋布獅子駝雞福祿羚羊長角馬哈獸上下皆回回
教門喜作佛事惡殺明永樂三年來朝貢

海南諸小國

龍牙犀角
吉里地悶

龍涎嶼
假里馬丁

龍牙門
竹步

卜刺哇

啞魯

那哈

黎代

南淳里

錫蘭并鰐形國

小葛蘭

溜山

祖法兒

增續文獻通考曰龍牙犀角其地內平外尖民皆蟻附
而居氣候常熱田禾勤熟尚淳厚男女椎髻親戚尊長
一日不見則攜酒問安地產沉速降真黃熟香鶴頂蜂

蜜砂糖貨用土印八都刺布青白磁器之屬 龍涎嶼

浮漚海面波擊雲騰每至春間羣龍來集于上交戲而遺涎沫番人乃架獨木舟登嶼採取以歸設遇風波則人俱下海一手揖水而至岨也龍涎初若脂膠黑黃色頗有魚鯨之氣久成大塊或大魚腹中剖出若斗大亦覺魚鯨間焚之其香清遠儗與蘇門價亦非輕 龍牙門在三佛齊之西北山門相對若龍角狀中通過船山塗田瘠米穀甚厚氣候常熱四五月間淫雨男女椎髻

穿短衫圍稍布擄掠為豪 吉里地悶居連迦羅之東

滿山茂林皆檀香樹無別產田肥穀盛氣候朝熱暮寒
男女斷髮穿短衫俱用金錢鐵磁之屬 假里馬丁與

交欄山相望海洋中其地山列翠屏溪田雖有米穀少
收氣候常熱俗甚澆薄男女髡髮竹布為衣種芭蕉採
其實以代糧煮海為鹽釀蔗為酒地產玳瑁殺羊貨用
爪哇布燒珠印布之屬 竹步邨居寨落地僻西方風
俗少淳草木不生男女搗髮出以布兜山荒地廣雨多

無霖地產龍涎乳香金箔獅子金錢豹駝雞有六七尺

高者 卜刺哇傍海為國居民聚落地廣斥鹵有鹽池

投以樹枝良久撈起結成白鹽不藉耕種捕魚為業男

女搥髮穿短衫圍稍布婦女兩耳帶金錢纓絡頂帶風

俗頗淳地產馬哈獸花福祿豹麂犀牛沒藥乳香龍涎

香象牙駱駝 啞魯自滿刺加國好風行四晝夜可到

有淡水港入港到國其國南大山北大海西蘇門答刺

國界東有平地堪種稻穀風俗淳朴國語婚喪等事與

瓜哇相同貨用稀少棉布名考泥泥其國王國人皆回
回人山出飛虎如猫灰色有肉翅如蝙蝠能走能飛不
遠土產黃速香金銀香之類乃小邦也 那哈即蘇門

荅刺師古湏又達那國乃西洋總路自滿刺國向西南
好風行五晝夜先到濱海一邨名荅魯蠻往東南十餘
里可到其國無城郭有大溪淡水流出于海潮水一日
長落二次其海口浪大常有船投沒其國南去大深山
北大海東亦大山至阿魯國界正西邊海山連小國二

處先至那孤兒王界後至黎代王界那孤兒即花面國
黎代在那孤兒王地界之西其南大山北臨巨海西
連淳里國為界國民一二千家自推一人為王屬于蘇
門答刺土無所產語言動用與蘇門同山有野犀牛至
多隨蘇門進貢 南淳里自蘇門答刺而西好風行晝
夜可到其國邊海人民千餘家皆回回人山產降真香
名蓮花降亦有犀牛國西北海內有大平頂峻山半日
可到名帽山山西大海正西洋也番名那沒黎洋西來

過洋船俱投此山其山邊二丈上下海水内生海樹即
黑珊瑚也其樹大者高二三尺如墨之黑似玉之潤有
枝婆婆可愛山下亦有居人二三十家皆自稱為王若
問其姓名則曰阿孤喇揲我便是王或問其次曰阿孤
刺杳我亦是王屬南淳里國所轄 錫蘭并裸形國自
南淳山開洋好風行三日見翠藍山在海中其山四五
惟一最大番名按薦蠻山人巢居穴處男子赤體如獸
畜土不產禾惟食山芋波羅蜜果芭蕉子之類或入海


捕魚蝦而食傳云身有寸布即生爛瘡昔釋迦佛過海
於此登岸脫衣浴水人盜其衣被釋迦佛誓以此至今
莫能服衣俗言出卯嶼即此地也過此山西行七八日
見鶯哥嘴山再二日至佛堂山始到錫蘭國名羅里
泊船登岸海邊山脚石上有一足跡長二尺許云釋迦
自翠蘭山岸脚踏其跡存焉中有淺水不涸人皆蘸之
以拭面目曰佛水清淨左有佛寺內有釋迦佛身側臥
及其佛牙并活舍利子等物在堂釋迦佛涅槃正此處

也去此四五十里到王居處國王鎖里人崇信佛教尊敬象牛不敢食牛死即埋之若私宰者罪死或納牛頭大金以贖其罪近有一山侵雲高聳山頂有人跡一深三尺長八尺餘云是人祖即盤古之足跡也山出青紅黃牙烏青米藍石昔喇泥窟沒盤諸寶石云是人祖淚結成海中有浮沙日照其上光彩潏灩曰有珍珠螺蚌聚集其上其國地廣人稠亞于爪哇民俗富饒椰子至多酒油皆以此造王以金為錢喜中國麝香紵絲青磁

盤碗銅錢樟腦以寶石珍珠交易王遣人齎寶石等隨
洋回寶船進貢 小葛蘭自錫蘭國羅里往西北好風
行六晝夜始到其國邊海東連大山西大海國王國人
皆鎖里崇信佛教尊敬象牛婚姻與錫蘭同雖小邦亦
遣人進貢 溜山自蘇門答刺國過帽山投西南船行
好風十餘日可到其國番名牒幹無城郭倚山聚居四
圍皆海地方不廣國之西去程途不等海中天生石門
如城闕八大處各有名曰沙溜人不知溜來溜麻里奇

溜加加溜每都里溜官嶼溜此八處皆有所主而通商
船又有小窄之溜傳云三千餘里所謂弱水三千正此
處也國人巢居穴處不識米穀但捕魚蝦而食不知衣
以樹皮蔽其前後遇風雨不順舟師失舵過其溜落瀉
水漸無力而沉 祖法兒自古里西北行十晝夜可到
其國邊海倚山無城郭東南大海西北重山國王國民
皆回回人體長大貌偉言語質朴土產乳香其香乃樹
脂也其樹似榆而葉尖長王以金鑄錢名倘迦出駝雞

身遍頸長如鶴高三四尺每脚上有二指毛如駱駝



御定淵鑑類函卷二百三十四

欽定四庫全書

子部

御定淵鑑類函卷二百三十五
六

詳校官內閣學士

臣尹壯圖

主事

臣祁韻士覆勘

總校官進士

臣繆琪

校對官中書

臣陸湘

謄錄監生

臣李廷對

欽定四庫全書

御定淵鑑類函卷二百三十五

邊塞部六

原氏

西羌總敘

羌無弋

吐蕃

湟中月氏胡

增大羊同

悉立

韋求拔

泥婆羅

大勃律

箇失蜜

骨出

蘇毗

多彌

伊吾城

白蘭

西羌總敘

原杜氏通典曰西羌本出三苗蓋姜姓也其國近衡山

及舜徙之三危漢金城之西南羌地是也濱於賜支漢續

書曰河關西可千餘里有河曲羌謂之賜支蓋析支也接漢河關縣屬金城郡其賜支在其西又按風俗通云

羌者其先本戎賤主
牧羊故羌字從羊

至於河首緜地千里南接蜀漢徼

外蠻夷西北鄙善車師諸國其俗氏族無定或以父名
母姓為種號在古不立君臣無相長一強則分種為酋
豪弱則為人附落更相抄掠以力為雄殺人償死無他
禁令其兵長在山谷短於平地不能持久而果於觸突
以戰死為吉利病終為不祥昔夏后相征畎夷七年然
後來賓至於后泄始加爵命由是服從殷武丁征鬼方
周王季伐西落更伐始呼翳徒之戎皆克之及武王伐

商耄髯率師會於牧野穆王西征獲其五王遷戎於太原平王之末渭首有狄獯邾冀涇北有義渠洛川有大荔渭南有驪伊洛間有楊拒泉臯潁洛以西有蠻氏在中國與盟會後晉滅驪陸渾叛晉晉荀吳滅之楚執蠻氏而盡囚其民周貞定王八年秦厲公滅大荔取其地自是中國少寇惟餘義渠種最強盛屢為秦患及昭王起兵滅之始置隴西北地上郡焉始皇兵務東向故得繁息秦平天下蒙恬西逐諸羌出塞漢初尚微弱景帝

時研種求徙於狄道安故武帝又西逐渡河湟初開河西置四郡其後先零種圍枹罕漢兵擊平之始置護羌校尉至宣帝代又寇金城趙充國立屯田且討且招降者三萬餘人置金城屬國以處之自後賓服後漢光武建武中初寇金城馬援討破降之徙七千口於三輔和帝後又反叛豪滇零稱天子南入益州東犯趙魏寇及雍城十餘年然後破散順帝永和中又叛漢將馬賢戰歿後段熲窮討及靈帝末方始平定自光武以後匈奴

少事唯西羌屢梗焉永嘉以後吐谷渾興焉本遼東鮮卑晉時數百戶西附於陰山屬晉亂遂吞并諸羌而有其地至其孫葉延遂為強國後魏末其主夸呂自號可汗建官多效中國洎隋煬帝遣觀王雄大破之其主伏允遠遯收其地列置郡縣鎮戍後轉衰弱唐初吐蕃始興焉其帥後魏末為臨松郡丞故其主有贊府之號高宗時遂滅吐谷渾盡有其地將軍薛仁貴等大敗於大非川儀鳳中工部尚書劉審禮又率兵十八萬敗歿於

青海調露中中書令李敬元又大敗於大非川武后如意初王孝傑方大破之始復龜茲等鎮萬歲通天初又寇梁州都督許欽明戰歿因贄府殺其名將諸欽陵之後累破敗遂劣於曩時矣

羌無弋

原杜氏通典曰羌無弋爰劍者秦厲公時為秦所拘執以為奴隸不知爰劍何戎之別也其後亡歸而秦人追之藏於巖穴中得免與剽女遇合於野女恥其狀被髮

覆面羌人因以為俗遂俱亡入三河間

三河即黃河析
支河湟中河

諸羌共畏事之推以為豪以射獵為事爰劔教之田畜
種人依之者益衆羌人謂奴為無弋以爰劔嘗為奴隸
故因名之其後世世為豪至爰劔曾孫忍時秦獻公初
立欲復穆公之迹忍季父邛畏秦之威將其衆種人附
落而南出析支河曲西數千里與諸羌絕遠不復交通
其後子孫分別各自為種任隨所之或為羗牛種越雋
羌是也或為白馬種廣漢羌是也或為參狼種武都羌

是也忍及弟舞獨留湟中忍生九子為九種舞生十七

子為十七種羌之興盛從此起矣漢景帝時研種留何

率種人求守隴西塞

今天水隴西等郡地

於是徙留河等於狄道

安故至臨洮氏道羌道

並今隴西金城安鄉臨洮等郡

武帝西逐諸羌

乃渡河湟築令居塞初開河西列置四郡通道玉門隔

絕羌胡於是障塞亭燧出長城外數千里時先零羌與

封養牢姐種解仇結盟與匈奴通合兵十餘萬共攻令

居安故遂圍枹罕漢遣將軍李息將兵討平之始置護

羌校尉統領焉羌乃去湟中依西海鹽池之左右漢遂因山為塞河西地空稍徙人以實之至宣帝時諸羌又相與解仇寇攻金城帝遣後將軍趙充國將兵討之充國屯田於臨羌東至浩疊務威信招降罕开及却掠者解散其謀乃擊之時已發諸郡兵六萬人酒泉太守辛武賢奏言請即擊之天子下書令充國博議往返者三四遂兩從其志武賢出擊羌降破數千人詔罷兵獨充國留屯田明年五月充國奏言羌本可五萬人軍凡斬

首七千六百級降者三萬六千二百人溺湟饑死者五

六千人定計遺脫與煎鞏黃羝

並是羝種

俱亡者不過四千

人初置金城屬國以處降羌十三世至燒當復豪健其

子孫更以燒當為種號自元帝以後數十年邊塞無事

至王莽末豪滇良內侵

燒當玄孫

及後漢初遂寇金城隴西

司徒掾班彪上言今涼州部郡皆有降羌與漢人雜處

習俗既異言語不通數為小吏黠人所侵奪窮乏無聊

故致反叛請依舊制益州部置蠻夷騎都尉幽州部置

領烏桓校尉涼州部置護羌校尉皆持節領護理其怨

結歲時循行問所疾苦又數遣使驛通導動靜使塞外

羌夷為吏耳目州部因此可得做備今宜復如舊以明

威防光武從之即以牛邯為護羌校尉建武十一年先

零種寇臨洮今和政地隴西太守馬援破降之後徙置天

水今郡地隴西今隴西及金城郡南境地是扶風三郡自燒當至滇良

世居河北大允谷後徙大小榆中由是始強至其子滇

吾永平初漢遣中郎將竇固等擊破降之徙七千口置

三輔而滇吾諸弟迷吾等數為寇盜章帝時馬防等討

破之於是臨洮索西迷吾等悉降防乃築索西城時西

海及大小榆左右無復羌寇隃廩相曹鳳上言西戎為

害前世所患臣且以近事言之自建武以來其犯法者

常從燒當種起所以然者以其居大小榆土地肥美又

近塞內諸種易以為非難以攻伐南得鍾存

鍾存別以種羌

廣其衆北阻大河因以為固又有西海魚鹽之利緣山

濱水以廣田畜故能強大常雄諸種今者衰困黨援壞

沮親屬離叛餘勝兵者不過數百流亡逃竄遠依發羌

臣愚以為宜及此時建復西海郡縣

漢武帝逐諸羌置西海郡

規固

二榆廣設屯田隔塞羌胡交關之路遏絕狂狡窺欲之

源又殖穀富邊省委輸之役國家可以無一方之憂於

是拜鳳為金城西部都尉將徙徙出屯龍耆金城長史

上官鴻開置歸義建威屯田二十七部侯霸復上置東

西邯屯田五部增留逢二部帝皆從之列屯夾河合四

十部四年大將軍鄧騭議欲棄涼州虞詡曰不可今羌

所以不敢入據三輔為腹心之患者以涼州在後故也
其土人所以摧鋒無反顧之心者為臣屬於漢故也若
棄其境域徙其人衆安土重遷必生異志如使雄豪相
聚席卷而東雖賁育為卒白起太公為將亦恐不之禦
當今之計者宜令四府九卿各辟彼州數人其牧守令
長子弟皆除為冗官外以勸勵荅其功勤內以拘致防
其邪計誠能如此則可無患於是四府皆從詔議滇零
死子零昌立元初元年遣兵屯河內通谷衝要三十三

所皆作塢壁設鳴鼓零昌進兵寇雍城遣任尚為中郎
將將羽林緹騎五營子弟屯三輔尚臨行懷令虞詡說
尚曰使君頻奉國命討逐寇賊三州屯兵二十餘萬人
棄農桑疲苦徭役而未有功效勞費日滋若此出不克
誠為使君危之尚曰憂惶久矣詡曰兵法弱不攻強走
不逐飛自然之勢也今羌皆馬騎日行數百來如風雨
去如絕弦以步追之勢不相及所以曠日而無功也為
使君計者莫若罷諸郡兵令出錢數千二十人共市一

馬如此可捨甲冑馳輕兵以萬騎之衆逐數千之寇追
尾掩截其道自窮使人利事大功立矣尚即上言用其
計乃遣輕騎抄擊斬首數百級明年秋漢又築馮翊北
界候塢五百所自後頻破之諸羌瓦解三輔益州無復
寇警永和中以來機為并州刺史劉秉為涼州刺史梁
商謂曰荒服荒忽無常而統領之道亦無常法臨事制
宜略依其俗今二君素性疾惡欲分明白黑孔子曰人
而不仁疾之已甚亂也務防其大故忍其小過機等天

性虐刻遂不能從到州之日多所擾發五年夏且凍傳
難種羌等遂反叛金城與西塞及湟中雜種羌大寇三
輔桓帝延熹二年燒當八種寇隴右以段熲為校尉將
兵及湟中義從羌二千人擊破之追討南渡河募先登
懸索相引刀折矢盡且聞且行晝夜相攻割肉食雪三
十餘日遂至河首積石山出塞二千餘里前後斬首並
受降各萬餘人東羌先零等自覆沒馬賢後既降又叛
帝以問熲對曰狼子野心難以恩納唯當白刃加領耳

計其所餘三萬餘落居近塞內久亂并涼累侵三輔西河上郡已各內徙安定北地復至單危自雲中五原西至漢陽二千餘里匈奴種羌並擅其地是為癰疽伏疹留滯脇下如不加誅轉就滋大今若以騎五千步兵萬人車三千兩三冬二夏足以破定無慮用費為錢五十億如此可令羣羌破盡匈奴長服內徙郡縣得反本土伏計永初中諸羌反叛十有四年用二百四十億永和之末復經七年用八十餘億費耗若此猶不誅盡餘

孽復起於茲作害今不暫疲人則永寧無期帝許之靈
帝建寧初頗與先零諸種戰斬首八千餘級頗復追之
且破且追士皆重繭既到涇陽餘寇四千落悉散入漢
陽山谷間時張奐上言東羌雖破餘種難盡頗性果慮
輕負敗難常宜且以恩降可無後悔詔書下頗頗復上
書曰臣本知東羌雖衆而軟弱易制所以比陳愚慮思
為永寧之算而張奐說羌強難破宜用招降云臣兵連
年累見折衄又言羌一氣所生不可誅盡山谷廣大不

可空靜臣伏念中興以來羌寇最盛誅之不盡雖降復
叛今先零雜種累以反覆攻沒縣邑剽掠人物上天震
怒假手行誅臣自動兵衆和師克自橋門以西落川以
東非為深險絕域之地車騎安行無應折衄案負駐軍
二年不能平寇誕辭空說僭而無徵何以言之昔先零
作寇趙充國徙居內地煎當亂邊馬援遷之三輔始服
終叛至今為梗故遠識之士以為深憂今傍郡戶口單
少數為羌所創毒而欲令降徒與之雜居是猶種枳棘

於良田養虺蛇於室內也本規三歲之費用五十四億
今適周年所耗未半而餘寇殘燼將向殄滅臣每奉詔
書軍不內御願卒斯言一以任臣臨時量宜不失權便
二年頴遂進營逼諸羌大敗之於瓦亭山羌衆潰東奔
復聚射虎谷分守諸谷上下門頴乃令千人於西縣結
木為柵廣二十步長四十里遮之然後兵擊之窮山深
谷之中處處破之斬其渠帥以下萬九千級獲畜產諸
物不可勝數於是東羌悉平

湟中月氏胡

原杜氏通典曰湟中月氏胡其先大月氏之別也在張

掖酒泉地為匈奴冒

音墨

頓所殺餘種分散西踰葱嶺其

羸弱者南入山阻依諸羌居止漢將霍去病破匈奴取

西河地開湟中於是月氏來降與漢人錯居雖依附縣

官而首施兩端

首施猶言首鼠

其從漢兵戰鬥隨勢強弱被服

飲食言語略與羌同亦以父名母姓為種其大種有七

勝兵合九千餘人分在湟中及今居又數百户在張掖

號曰義從胡後漢靈帝中平初與北宮伯玉等反殺護
羌校尉泠徵金城太守陳懿遂寇亂隴右焉

氏

楊氏
鄧至

宕昌
武興

原杜氏通典曰氏者西胡之別種在冉駝東北

今通化
郡地之

東廣漢之西

今涿潼遂寧德
陽郡治之北也

君長數十而白馬最大漢

武帝元鼎六年開分廣漢西部合為武都郡

今同谷郡
武都地

排其種人分竄山谷或在上祿

今同
谷郡

或在汧隴左右

今天

水汧陽

其種非一或號青氏或號白氏或稱冉氏此蓋

中國人即其服色而名之也 增宋書曰略陽清水氏

楊氏秦漢以來世居隴右為豪族漢獻帝建安中有楊騰者為部落大帥騰子駒勇健多計略始徙仇池仇池地方百頃因以百頃為號四面斗絕高平地方二千餘里羊腸蟠道三十六回山上豐水泉煮土成鹽駒後有名千萬者魏拜為百頃氏王千萬子孫名飛龍漸強盛晉武假征西將軍還居略陽無子養外甥令狐氏子為子名戊按晉惠帝元康六年避齊萬年之亂率部落四

千家還保百頃自號輔國將軍右賢王關中人士奔流
者多依之文帝元嘉十九年龍驤將軍裴方明等伐氏
剋仇池 南史曰河南王者其先出自鮮卑慕容氏廆
嗣位吐谷渾西徙地在河南故以為號

吐谷渾
詳見後

宕昌國

在河南國之東益州之西北隴西之地西羌種也宋孝
武世其王梁瑾忽始獻方物梁天監四年王梁彌博來
獻甘草當歸詔以為河涼二州刺史隴西公宕昌王佩
以金章子彌泰大同七年復策授以父爵位其衣服風

俗與河南略同 鄧至國居西涼州界羌別種也宋文

帝時王象屈耽遣使獻馬梁天監五年鄧至王象舒彭
遣使獻黃耆馬其俗呼帽曰突何其衣服與宕昌同

武興國本仇池楊難當自立為秦王宋文帝遣裴方明
討之難當奔魏其兄子文德又聚眾葭蘆宋因授以爵
位魏又攻之文德奔漢中文德弟文度立以弟文洪為
白水太守屯武興宋世以為武都王武興之國自於此
矣難當族弟廣香又攻殺文度自立為陰平王葭蘆鎮

主文洪死以族人集始為武都王集始子紹先襲爵位
紹先死子智慧立梁大同元年剋復漢中智慧遣使上
表求率四千戶歸梁詔許焉即以為東益州其國東連
秦嶺西接宕昌其大姓有苻氏姜氏梁氏言語與中國
同著烏皐突騎帽長身小袖袍小口袴皮鞋地植九穀
婚姻備六禮知書疏種桑麻出紬絹布漆蠟椒銅鐵

吐谷渾一

原杜氏通典曰吐谷渾本遼東鮮卑也西晉時羌帥徒

河涉歸有二子長曰吐谷渾少曰若洛廐

胡罪反

代統部

落別為慕容氏渾廐長廐正嫡父在時分七百戶與渾
渾與廐二部俱牧馬馬鬪相傷廐徑遣使謂渾曰先公
處分與兄弟異部牧馬何不相遠而令馬鬪渾曰馬是
畜生食草飲水春氣發動所以致鬪鬪在於馬而怒於
人耶乖別甚易今當去汝於萬里之外矣於是擁馬西
行乃西附陰山屬永嘉之亂始度隴西止於枹罕而後
子孫據有甘松之南洮水之西南極於白蘭在益州西

北其地四時常有冰雪惟六七月雨雹甚盛若晴則風飄沙礫有麥無穀其青海周迴千餘里海中有小山每冬冰合後以良牝馬置此山至來冬收之馬有孕所生得駒號曰龍種吐谷渾嘗得波斯草馬放入海因生驄駒能行千里故時稱青海驄焉至其孫葉延以禮云公孫之子得以王父字為氏吾祖始自昌黎先宅於此今以吐谷渾為氏六傳至夸呂隋開皇中夸呂侵弘州遣上柱國元諧擊之賊悉發國中兵自曼頭至於樹敦甲

騎不絕詣頻擊破之夸呂率其親兵遠遁其名王十三人各率部落而降夸呂在外且百年死以後還以慕容為姓其子伏允立煬帝初伏允遣子順來朝帝令鐵勒襲大敗之伏允東走保西平帝復令觀王雄以掩之大破其衆伏允遁逃部落來降十萬餘口伏允懼南遁於山谷間其故地皆空自西平臨羌城以西且末以東祈連以南雪山以北東西四千里南北二千里皆為隋有置郡縣鎮戍發天下輕罪徙居之

其地在今西平郡之西張掖酒泉郡之北

隋氏置西海且末河源等郡於是留順不之遣伏允無以自資率其

徒數千騎客於党項大業末天下亂伏允及順復其故地唐貞觀中李靖侯君集破滅之伏允遠遁為左右所殺其子大寧王順歸降於是重建其國封順為西平郡

王仍加越

反巨屈

胡呂烏甘豆可汗之號旋又為其下所

殺十年立順子諾曷鉢為河源郡王主其國自爾衰弱而吐蕃強盛至高宗時為其破滅諾曷鉢以餘衆復來降於靈州之境置安樂州以諾曷鉢為刺史其故地並

沒於吐蕃後又封渠帥慕容宣超為青海王武太后朝
郭元振上安置降吐谷渾狀曰臣昨見唐休璟張錫等
衆議商量其吐谷渾部落或擬移就秦隴或欲移近豐
靈責令漸去邊隅使居內地用為防閑之要冀免背叛
之虞臣以為並是偏見之一端未為久長之深策若近
秦隴則與監牧雜居如在豐靈復與默啜甫邇必以慮
其翻覆須有遷移縱至中土安可易其本性至如耽爾
乙句貴往年王孝傑奏請自河源軍徙居靈州用為恆

便及其逃叛之日穿監牧掠馬羣所在傷夷大損州縣
是則遷居中土無益之明驗矣往者素和貴雖背聖化
只從當所居地叛走其於中國無所損傷但是失少許
吐渾耳豈與句貴之為害同日而語哉今吐谷渾之降
者非驅畧而來皆是渴慕聖化衝鋒突刃棄吐蕃而至
者也臣謂宜當循其情以為制勿驚擾之使其情地稍
安則其係戀心亦日厚當涼州降者則宜於涼州左側
安置之當甘州肅州降者則宜於甘肅左側安置之當

瓜沙降者則宜於瓜沙左側安置之但吐蕃所降之處
皆是其舊居之地斯輩既投此地實有戀本之情若因
其所投而便居之其情易安因數州而磔裂之則其勢
自分順其情分其勢而不擾於人善矣 增續文獻通
考曰遼太祖天贊三年攻拔其城後自太宗天顯八年
至聖宗統和二年無歲不通貢興宗重熙十一年以吐
谷渾多鬻馬於夏詔沿邊築障塞防之自後無聞

吐谷渾二

增老駝知風

神駒放海

舊唐書地兼鄯善且末西北有流沙數百里夏有熱風傷

弊行旅風將至老駝知之引項而鳴以口鼻埋沙中人以為候即以氈擁蔽口鼻而避其患青海驄見前

青海周千里

黃沙號一州

青海見前北史阿豺立自號驃騎將軍沙州

刺史部內有黃沙周迴數百里不生草木因號沙州

西登強山觀墊江之源

北望積石窮河水所出

北史阿豺昇西強山觀墊江源問於羣寮曰此水東流更有何

名由何郡國入何水也長史曾和曰此水經仇池過晉壽出宕渠始號墊江至巴郡入江度廣陵歸於海阿豺曰水尚知歸吾雖塞表小國而無所歸乎遣使通宋獻其方物舊唐書侯君集與江夏王道宗達於柏梁北望積石山觀河源之所出焉

党項一

原杜氏通典曰党項羌在古析支之地漢西羌之別種
党項始強南雜春桑迷桑等羌北連吐谷渾其種每姓
別自為部落一姓之中復分為小部落大者萬餘騎小
者數千騎不相統一有細封氏費聽氏往利氏頗超氏
野辭氏房當氏來禽氏拓跋氏最為強族 增宋史曰
唐貞觀至上元間內附散居西北邊元和以後頗相率
為盜會昌初武宗置三使以統之在邠寧延者為一使

在鹽夏長澤者為一使在靈武麟勝者為一使五代亦嘗入貢今靈夏綏麟府環慶豐州鎮戎天德振武軍並其族帳太祖建隆二年代州刺史折也埋來朝也埋党項之大姓世居河右有捍邊之功故授以方州召令入覲而遣還續文獻通考曰於遼叛服不常開泰二年西南面招討使斜軫奏党項諸部叛者皆遁黃河北模赧山其不叛者曷黨烏迷兩部據其地今復西遷詰之則曰逐水草不早圖之恐遂為患又聞前後叛者多投

西夏西夏不納詔遣使再問西遷之意若歸故地則可
就加撫諭使不報上怒遂西伐五年其長魁可來降興
宗重熙十三年復叛附夏國元昊親執党項二部酋長
來降

党項二

增五月草生

中秋雪降

舊唐書土無五穀氣候多風寒五月草始生八月霜雪降

候草木以記歲

殺牛羊以祭天

北史無文字但候草木以記歲時三

年一聚會殺牛羊以祭天

一種在赤水之西

別部居雪山之下

舊唐書又有黑党項在赤水之西
雪山党項姓破丑氏居雪山之下

吐蕃

原杜氏通典曰吐蕃在吐谷渾西南不知有國之所由
或云禿髮利鹿孤有子樊尼其主傳檀為乞伏熾盤所
滅樊尼率餘種依沮渠蒙遜其後子孫西魏時為臨松
郡丞與主簿皆得衆心因魏末中華擾亂招撫羣羌日
以強大遂改姓為罕

蘇骨反

敎野至今故其人號其主曰

贊府貴臣曰主簿又或云始祖贊普自言天神所生號

鵲堤悉補野因以為姓

寧教野與悉補里言訛其實其一也或云本姓棄蘇農也

其

國出鄯城五百里過烏海入吐谷渾部落彌多彌蘇毗
及白蘭等國至吐蕃界其國都號為邏娑城用法嚴整
議事則自下而起因人所利而行之此其所以能強且
久也重壯賤老重兵死惡病終以累代戰歿者為甲門
臨陣奔北者懸狐尾於其首表其似狐之怯其贊普弄
贊雄霸西羌隋開皇中其主論贊索弄贊都牂牁西匹
播城以五十國西南與婆羅門接唐貞觀十五年正月

以宗室女封文成公主降於吐蕃贊普命禮部尚書江夏王道宗送之弄贊親迎於河源見王人執子壻禮甚謹歎大國服飾禮儀之美俯仰有媿沮之色謂所親曰我祖父未有通婚大國者今我得尚唐公主當築一城以誇後代也武后如意初武威軍總管王孝傑大破吐蕃復龜茲于闐疏勒碎葉四鎮至萬歲通天初又寇涼州執都督許欽明欽陵兄弟皆有才略欽陵多居中諸弟分領方面諸蕃憚之二年吐蕃大論欽陵遣使請和

武太后遣前梓州通泉縣尉郭元振往至野狐河與陵
遇曰大國久不許陵和陵久不遣蕃使以久無報命故
去秋有甘涼之抄斯實陵罪今欲和好能無懼乎振乃
謂曰論先考東贊以宏才大畧服事先朝結好通親荷
榮承寵本期傳之永代垂於無窮論不慕守舊恩中致
猜阻無故自絕日尋干戈屢犯我河湟且父通之子絕
之豈為孝乎父事之子叛之豈為忠乎然論英聲籍甚
遐外各自為主奚為懼乎陵曰今天恩既許和好其兩

國戍守請罷置以便萬姓豈不休哉然以西十姓突厥
四鎮諸國或時附蕃或時歸漢類多翻覆乞拔去鎮守
分離屬國各建侯王使其國自為君人自為守既不疑
漢又不屬蕃豈不人免憂虞振曰十姓四鎮本將鎮靜
我落以撫寧西土通諸大邦非有他求論今奚疑而有
憂虞乎陵曰然緣邊守將多好功名見利而動罕守誠
信此蕃國所以深憂振曰十姓諸部與論種類不同山
川亦異爰覽古昔各自區分復為我編人積有年歲今

論欲一言而分離數部得非昧弱苟利乎陵曰使人豈
不疑陵貪冒無厭認陳利害窺竊諸部以為漢邊患耶
陵若愛漢土地貪漢財幣則青海湟川實邇漢邊其去
中州蓋三四千里必有窺羨何不爭利於此中而突厥
諸部懸在萬里之外磧漠廣莽殊異中國安有爭地於
萬里外而能為漢邊患哉舍近務遠計豈然也但中州
人士深謀多計天下諸國皆為漢并雖大海之外窮塞
之表靡不磨滅今吐蕃塊然獨在者非漢不貪其土地

不愛其臣僕實陵兄弟小心謹密得保守之耳往者高宗以劉審禮有青海之役乃使黃仁素賈守義來和陵之上下將士咸無猜忌故邊守不戒嚴和事曾未畢以為好功名人崔知辯從五侯斤路乘間隙瘡痍我衆驅掠牛羊蓋以萬計自此陵之國人大危慄和事矣今之此求但懼好功名者之吞噬冀此為翰屏以虞之實非有他懷焉振曰茲事漫汗體大非末吏所能明論當發使奉章以聞取裁於聖主陵乃命郎宗乞思若為使振

曰今遣使之後國不可更犯漢邊且番使前後入朝不時遣者良以使去之後兵仍犯漢故朝廷躊躇曰是給徒改我也以為偵諜不以為使人遂遷延無報今若踵反

前陵塞是故陷所去人使孰謂請和也陵俛首蹶蹶久之曰陵與國人咸憾崔知辯之前事故嘗有此舉以虞好功者之來侵比實以選練騎士三萬分路出師使人既有此言今既於和事非便安可相違既罷兵散卒遂指天為信 增續文獻通考曰西番即吐蕃唐末衰弱

種類分散入內屬者謂之熟戶餘謂之生戶宋時朝貢
不絕神哲高三朝皆授以官遼時亦入貢又有小蕃大
蕃胡母思山蕃之別元世祖時郡縣其地設官分職以
吐蕃僧八思巴為大寶法王帝師領之嗣者數世弟子
號司空司徒國公佩金玉印章者前後相望其山則崑
崙極高峻雪至夏不消綿亘五百餘里黃河經其南其
風俗樸魯上下一心君臣為友吏治無文字懷恩重利
尊釋信詛其產金銀銅錫犛牛名馬天鼠皮獨峰駝青

裸麥瑩豆獮羊地距松潘四百八十里東北鄰陝西東
界四川雲南明洪武六年大將軍徐達征西番既拔河
州於是河州以西朵甘思烏思藏等部悉歸令故有官
者至京授職遂以攝帝師喃加巴藏卜為熾盛佛寶國
師元國公南哥思丹八亦監藏等為都指揮同知宣慰
使元帥招討等官分其地設都指揮使司二指揮使司
一宣慰使司三招討使司六千戶所十有七以部之仍
其俗封番僧為六王曰灌頂國師曰贊善王曰贊化王

曰正覺大乘法王曰如來大寶法王皆給印章誥命自是襲封不易

吐蕃二

增聯毳帳以為居

有城郭而不處

唐書吐蕃傳其國君號贊普有城郭

而不處聯毳帳以居號大拂廬部人處小拂廬

昭陵刊像形之石

赤嶺豎

分界之碑

舊唐書高宗嗣位弄讚致書云天子初即位若臣下有不忠之心者當勒兵以赴國除討

并獻金銀珠寶十五種請置太宗前高宗嘉之乃刊石像其形列昭陵元闕下

又曰詔御史大夫崔琳充使

報聘仍於赤嶺各豎分界之碑約以更不相侵

吐蕃三

增疏唐于休烈請不賜吐蕃書籍疏曰臣聞吐蕃之性
慆悍果決敏情恃銳喜學不回若達於書必能知戰深
於詩則知武夫有師干之試深於禮則知月令有廢興
之兵深於傳則知用師有詭詐之計深於文則知往來
有書檄之制何異借寇兵而齎盜糧也臣聞魯秉周禮
齊不加兵吳獲乘車楚屢奔命且公主遠適異國返求
良書愚臣料之恐非本意慮有奔北之類教於中若陛

下慮失蕃情以備國信必不得已請去春秋當周道既衰諸侯強盛禮樂自出戰伐交興情偽於是乎生變詐於是乎起則有以臣召君之事取威定霸之名若與此書國之患也傳曰于奚請曲縣繁纓仲尼云惜也不如多與之邑惟名與器不可假人彼固貪婪貴僨易土正可錫之錦綺厚以玉帛何必率從其求以資其智

大羊同

增文獻通考曰大羊同東接吐蕃西接小羊同北直于

關東西千餘里勝兵八九萬人其人衣氍毹以畜牧為業地多風雪冰厚丈餘所出物產頗同蕃俗無文字但刺木結繩而已刑罰嚴峻其王姓姜葛有四大臣分掌國事自古未通中國唐貞觀十五年遣使來朝

悉立

增文獻通考曰悉立在吐蕃西南戶五萬有城邑邨落依溪澗丈夫以繒綵纏頭衣氍毹婦人多著短裙其畜多水牛殺羊雞豕穀宜杭稻麥豆饒甘蔗諸果喪制以

黑為衣一年就吉刑有剗劓羈事吐蕃自古未通中國
唐貞觀二十年遣使獻方物

章求拔

增文獻通考曰章求拔或云章揭拔本西羌種也在悉
立西南居山內近代移出西接東天竺遂衣服變西羌
之俗其地延袤八九百里勝兵二千餘人居無城郭好
為寇掠商旅患之聞悉立入朝亦遣使朝貢

泥婆羅

增文獻通考曰泥婆羅國在吐蕃西其俗剪髮與眉齊
穿耳瑱檀竹簞緩至肩者以為姣麗食用手多商賈少
田作以銅為錢面文為人背文為馬以板為屋壁皆雕
畫俗重博戲頗解推測盈虛兼通歷術事五天神鑄石
為像每日清水浴神烹羊而祭其王那陵提婆身著真
珠諸寶玉垂金鈎玉瑱佩寶裝伏突坐獅子座常散花
然香大臣及左右並坐於地有阿耆婆滿池周迴二千
餘步以物投之即生煙焰懸釜而炊湏臾而熟唐永徽

二年遣使朝貢

大勃律

小勃律附

增文獻通考曰大勃律或曰布露直吐蕃西與小勃律接西鄰北天竺烏菟屬吐蕃唐萬歲通天逮開元時三遣使朝故冊其君蘇弗舍利支離泥為王死又冊蘇麟陀逸之嗣王凡再遣使貢方物小勃律去京師九千里而羸開元初王沒謹忙來朝詔冊為小勃律王至蘇失利之立為吐蕃陰誘妻以女故西北二十餘國皆臣吐

蕃貢獻不入安西都護三討之無功天寶六載詔副都
護高仙芝伐之平其國於是拂菻大食七十二國皆震
恐歸附執小勃律王及妻歸京師詔改其國號歸仁軍
募千人鎮之

箇失

增文獻通考曰箇失蜜或曰迦濕彌邏北距勃律五百
里環地四千里山回繚之他國無能攻伐王治撥邏勿
還布邏城西瀕彌那悉多大河地宜稼多雪不風出火

珠鬱金龍種馬毛褐世傳地本龍地龍徙水竭故往居
之唐開元初遣使者朝八年詔冊其主真陀羅祕利為
王間獻胡藥天木死弟木多筆立遣使者佛理多來朝
且言有國以來並臣天可汗受調發國有象馬步三種
兵臣身與中天竺王阇吐蕃五大道禁出入戰輒勝有
如天可汗兵至勃律者雖衆二十萬能輸糧以助又國
有摩訶波多磨龍池願為天可汗營祠因丐王冊詔內
佛理多宴中殿賜賚優備冊木多筆為王自是職貢有

常其役屬五種亦名國所謂咀义始羅者地二千里有
都城西南餘七百里得僧訶補羅地三千餘里亦治都
城東南山行五百里得烏刺尸地二千里有都城宜稼
穡東南限山千里即箇失蜜西南行險七百里得半笈
蹉地二千里又得曷邏閣補羅者其大四千里有都城
多山阜人驍勇五種皆無君長云

骨咄

增文獻通考曰骨咄或曰珂咄羅廣長皆千里王治思

助建城多良馬赤豹有四大鹽山山出烏鹽唐開元十七年王俟斤遣子骨都施來朝二十一年王頡利發獻女樂又遣大首領多博勒達于朝貢天寶十一載冊其王羅金郎為葉護

蘇毗

增文獻通考曰蘇毗本西羌族為吐蕃所并號孫波在諸部最大東與多彌接西距鵲莽破戶三萬唐天寶中王沒陵贊欲舉國內附為吐蕃所殺子悉諾率首領奔

隴右節度使哥舒翰護送闕下玄宗禮之

多彌

增文獻通考曰多彌亦西羌族役屬吐蕃號難磨濱犂牛河土多金貞觀六年遣使者朝貢

伊吾城

增文獻通考曰伊吾城者漢宜禾都尉所治商胡雜居勝兵千附鐵勒人驍悍土良沃隋末內屬置伊吾郡復臣突厥貞觀四年來朝頡利滅舉七城降列其地為西

伊州

白蘭

增文獻通考曰白蘭羗之別種東北接吐谷渾西至吐
利摸徒南界鄯鄂風俗物產與宕昌同勝兵萬人勇於
戰鬪唐武德六年使者入朝以其地為維恭二州貞觀
六年與契苾數十萬內屬永徽時特浪生羗卜樓大首
領凍就率衆來屬以其地為劍州龍朔後白蘭春桑及
白狗羗為吐蕃所臣籍其兵為前驅白狗與東會州接

勝兵纔千人在西北者天授中內附戶凡二十萬以其地為朝吳浮歸十州散居靈夏間

御定淵鑑類函卷二百三十五